

梧

溪

集

二

王原吉梧溪集

第二卷



題徐孺子小像

士何以居亂世兮言欲遜而行危苟背夫聖哲之明訓兮
離刑戮也固宜昔漢室猶大木將顛兮非一繩之能維故
先生有見於斯兮蓄瓊辟而悉辭蚌以珠而腹披兮孰若
悶采于川坻金不為燥濕而變渝兮常介然而自持夫窮
達之道同兮樂天命而焉悲矧高風軼節之不可攀兮足
以振頑懦而羞汚卑像載拜酒載薦兮微先生而吾誰師

懷賢懷王光大 有引

光大宣州太平縣人世大族從文節汪公明春秋科舉
罷學古詩文於逢有紳交之道因慕梁鳩之懷高恢也
作懷賢一章

姓吾同兮道吾同神相交兮見無從孰謂今人兮無國士
之風

懷德懷王先生 有序

王先生諱森字道山建德人性機警夙喪父得廢疾毋
患其生業未植聞有道士黃雲西自陝來推人命若神
俾先生贅見之白其故黃慨然納為弟子盡傳其學冠
遊術大行母賴以壽終江西省達官側室被幽置數年
一日召先生推其命先生曰是婦當因子而貴且容德
全真賢媛也達官感悟見其子歡如初內御史篤敬夫
之父靖江公居信州永豐素無子後得御史於其侍婢
母夫人嫉之先生時挈家是邑得所生辰輒颺言曰異
日狀元也夫人知愛若已出年十九果及第世服先生
長者也至正壬午逢侍先君之永豐首幣見問所奧喜
謂曰子姑習儒俟子旋里當不辭千里行以授所蘊竟

如其言留江陰三閱月逢送至錢塘先生訣別曰吾瞑
目有日子行負大名幸毋忘逢受命惟謹先生抵家大
會親友凡七日無疾而卒壽六十七子三先生貌古怪
明洪範易素問名公卿道過信率遣使致書饋或即其
廬禮焉先生多本君平之言答之始先生薄遊永豐豐
之人尊信恐後爲築室娶婦買田園畀之或蹶躄出閭
巷人爭候款間留旬月而返猶洛人之事康節翁也如
是者三十年特爲逢一出及還遂長逝嗚呼哀哉作懷
德一章

命婦詞二首

涼風灑魚軒纖月照蛾眉瑤琴歇清奏更點何其遲鯤鯨
深跋浪良人海中坻不死盜賊手爲是千金兒隱忍就功
名末路將有爲念昔從征日堂堂天王師星羅烏蜚船雲
布蚩尤旗號令非已出三軍血流斯秋高氣蒼然蕭藿零
露滋河漢橫閣道孤雁鳴多時夜闌燈結花試卜歸來期
寒月照象服乃在深房櫳蘭蕤馥甲帳憂心獨冲冲良人
忠孝門載筆明光宮日賜水晶鹽夜繼蓮炬紅推恩到箕
帚雙闕尤穹隆燕鴻天北南牛女河西東補袞無失遺抱
衾甘長終兵戈寢蜂起篁竹嘯悲風山川路相繆十信還
一通雲臺漢光業石鼓周宣功相望善終始自冷青青松

舊衣篇唁失位者

舊衣丘中麻新衣陌上桑桑蠶輸蠶絲染織雲錦章麻成
布在軸皎白如雪霜皎白貧賤宜妻著奉姑嫜夫今位上
公紈綺魚貫行身被龍五爪賜自吾 天王既貴習乃移

舊衣棄固當沐猴且冠帶輿儻尚銀黃腐儒餘束書芟製
松桂航薄游滄江岸事至涕忽滂狐裘三十年德盛國益
強青氈一微物偷兒亦驚惶願言收所棄幹濯還輝光顛
倒慎雞鳴厭浥防露灑施笥復虛設鼠櫪卒壞傷春風花
落時盍記雙上堂古來弊帷蓋猶備狗馬藏新衣窄從短
舊衣寬較長聞歌舊衣篇舊人詎終忘

奉謝楊山居宣慰寄遺蠶紙

明公枉珍遺開絨霜雪色自非玉女春必假天孫織剡藤
失浮薄海苔無光澤元是祕府藏親向御手得秋風柿葉
館筆研久荒寂飛來一朵雲列第厭金碧如何上所賜波
及滄浪客焚香再封累還坐翻太息盜發唐昭陵無復晉
墨蹟顧茲抱貞素恬閱世代易尚憐先代時龍翰溢邦國
蠶繰盡輸征鷄結曾不惕吾元本恭儉世祖膺聖德
羊鞞代白麻遂爾混區域侈用幾何年離亂亦以極明星
爛河嶽雞叫扶桑白當寫大寶箴直上玉階側詎敢輕點
泫令人却前滌

無家燕

嗟嗟無家燕飛上商人舟商人南北心舟影東西流芹漂
春雨外花落暮雲頭豈不懷故栖烽暗黃鶴樓樓有十二
簾一一誰見收衆雛被焚蕩雙翅亦斂擘含情盼鬼蝶失
意依訓猴茅茨固低小理勢難久留昔本烏衣君今學南
冠囚燕燕何足道重貽王孫憂

題天台陶宗儀母趙縣主德真墓志銘後趙系出汴
宋至今人猶以縣主稱云

陶母趙宗室貞靜白雲姿明璫秋水珮幼小比光輝自通
良人姓三星天一涯孔雀金繡屏十年夢參差手製丹霞

裳及嫁不稱時造次井臼間跬步必中規良人既祿仕婉
婉黃髮期落月鑒綺疏春霜薄羅帷生而賢且淑焉用壽
考爲銘旌書縣號琬琰瘞華辭念昔岐山鸞其德未云衰
王風遽淪變撫卷慨今斯烏鵲橋銀河青鳥使瑤池何如
五采羽來儀竹梧枝梧竹日夜長雨露深孝思孝思人子
慕爲述二南詩

古孝篇贈軍曹陳貞

軍曹例視爲軍役不丁憂而貞能行之貞讀書睦人

走有跪乳羝飛有反哺烏誰使人無親不以喪制拘卓哉
軍曹掾嘗事鄉大儒親老得抱關尚敢辭卑污寒城落葉
暮聞訃即就途公侯苦遮留泣告奚他圖孝居百行首違
孝忠焉輸三軍各縞素送別恐踟躕我適遇諸野感動復
歎吁國家猶大木百世雨露濡不知衛本根立見枝悴枯
吾元敦孝治王風諒交孚苟能外夷俗悖犯無足誅著

梓溪集二

茲古孝篇何當鑒狂愚

秋夜歎

大星芒鬣張小星光華開皇天示兵象勝地今蒿萊河岳
氣不分燭龍安在哉參贊道豈謬積陰故遲回踈風夜蕭
蕭野燐紛往來安知非游魂相視白骨哀汨汨飲馬窟冥
冥望鄉臺於時負肝膽慷慨思雄材

積雨齋居

積雨生夏寒盛陰失朝景白鳥巢依閣青梧葉垂井幽觀
知候變遠引忘世梗淮水方浸淫吾甘繫煙艇

獨夜

獨夜卧齋館斜月半窓白露草濕熒熒水禽啼嘖嘖神超
赴清漏慾寡忘以客蓬萊在市朝弱水非所隔

帖侯歌

有引

昌國州達魯花赤高昌帖木兒平章買住之猶子也海
寇犯境侯連與戰破之衆寡不敵或勸侯遁去侯曰
是我死所也遂死之江浙省參政樊執敬爲文遣使致

祭請謚于朝逢爲作歌云

仙居縣丞寇海邦白晝突入千矛鏃帖侯親騎大宛馬快
劍躍出蒼龍雙須張皆裂赫如虎殺氣雄風助虜武鬪體
擲地血飛雨短兵未接寇偃鼓天南弧矢夜掩光狼角赭
赤雲玄黃洪濤鯨鯢去咫尺再戰身與城存亡艤幢千百
水犀手主者誰歟仆旗走岳立不轉鏃殺之殉忠國家良
亦厚君不見台州牧長金兜整氣節自是名臣流情鍾兒
女挫堅銳卒墮賊計空貽羞男兒真偽那料得長松古柏
寒增色鴻飛冥冥我何及落日荒山淚橫臆

孝僧行

梧溪集二

五

天姥山中好慈竹竹上慈烏雛並宿小雛飛隨白鸚鵡學
念觀音松水曲觀音念得孝感生一啄一飲難爲情故園
花滿紫荆樹春雨春風啼野鶯僧康辭親今十載堂上
手縫衣帶在關梁阻絕音問踈霜露侵尋鬢根改鬢根
改兒身長兒身徒長無羽翼兒心不定空飄揚祗殘瞻
雲雙眼淚夜灑黃金獅座傍

孟郡王印歌

有引

宋太師信安郡王諱忠厚六世孫崇明同知集復得王
所佩印於中吳里第古墻下逢歌曰

黃葉道左秋風前故人解后何愴然手持古印不敢釋却
立載拜徵詩篇印銅空青幾風雨近出故居墻下土堂燕
頻移百姓家官物猶存郡王府宋朝前後十六主外戚功
臣三四數至今孟氏孫獨賢爲有詩書繼鄒魯我試拂拭

生耿光篆文蔚然龍鳳驤歸而寶之金玉相公侯復始世
其昌

則天皇后玉璽歌楊山居宣慰徵賦

皇朝內府多舊璽盡畀太師後至元伯顏丞相作鷹隆黨臣勢焰
同薰天亦得分爲玉押字武后佩璽雪瑩如璞薄文深難
改圖當時還收藝文監此獨善後咸驚吁唐家諸陵寶氣
息后墓至今華表直天遺尤物鑒來者我歌君聞秋四壁
月落雞鳴大江白

松石歌壽劉澹齋揔管

吾聞卯山在處之上松林稠樛枝連蜷陰蔽牛儲英孕秀
三千秋精靈夜逐仙人遊仙人氏葉喬松儔栖神鍊魄道
並修功成朝帝白玉樓雞犬亦得沾餘休彼辭斧斤謝薪
樗化爲異石森琳球好事深入窮冥搜不遠千里貢劉

格藻集二

六

侯劉侯置之軒檻側波濤之痕雲霧色盤根錯節不肯直
戴瘦啣瘤裁咫尺瓌竒合有神護惜偃蹇欲與天終極閭
闔風來翠成滴昆侖日下光相射春生寒盡土花蝕驥伏
龍驤勢俱敵時時青嵐紫煙羃冱澀淋漓收不得翻愁雷
公鞭霹靂取向鴻蒙女媧國劉侯自是天門客大手真能
補天坼乘槎路遠銀潢隔老卧江南一區宅賓筵大開浮
大白香重光寒凝琥珀霓裳曲停第三拍聽我狂歌墮巾
幘松兮石兮壽千百

故將軍歌有序

故將軍歌哀上萬戶蒙古氏丑厮侯也侯字靜如以世
勲佩三珠金虎符官昭勇大將軍鎮江陰謙恪尚義人
悅慕之至正十一年淮西亂督軍九江取道安慶時湖
廣威順王在道王聞侯頓兵即帳下以退守地虛弱強

侯爲張飲之會宣讓王遣使諭旨曰安慶控淮江要衝
命侯就鎮前後出師凡二十九捷十二年冬十一月寇
悉衆水陸並進侯連破之翌日復大破輕舟追後中流
矢卒是月二十九日也二王哭之哀給白銀五十兩賻
其葬先是逢與宴侯第時海內無事嘗謂侯曰太歲在
辰侯當保障一方戰勝恐後不利盍慎諸侯答曰大丈夫
夫勦力王室死無憾也侯事親孝征閩寇衛海漕咸有
功云

將軍舊乘青驪驕蒼龍金虎雙輝光揚旌伐鼓靖閩徼山
鬼迸落黃茅岡長鯨喊呀欲東噬以身扞海民樂康十年
楊柳陰環堵一夜首宿空沙場淮江蕭條咽流水殺氣妖
氛亘彭蠡提兵假道古舒州親王遮留勞玉趾王言三邊
賊緣蟻將軍不止我其死月氏罽醜酒數升諾重泰華輕
丘陵儲胥孤懸使雜守睥睨危急期先登藿蒲獵獵開金
翅篁竹深深攢鐵菱長驅大捷二十九生俘千人梟萬首
猙獰健兒駿奔走電掣雷訇若神授東南瘡痍合未蘇終
焉性命豺狼有仲冬炎風動地吹太陽血赤芒星垂將軍
百射百中之弓撥矢鈞天爾爲黃蕉丹荔芳菲菲保障千
里今誰祠霜繁雪稠侯我思

送宋宗道歸洛陽

選郎分手楚天涯萬里春明穩到家庭下已生書帶草馬
頭初見米囊花汴淮淡漫經梁苑星斗參差犯漢槎中國
未應風俗異舊京寧覺路途賒鮫宮獻珮當明月鶴馭吹
笙隱太霞貂弊世憐蘇季子賦成人哭賈長沙若爲撫事
傷遺跡正用懷才待物華聞道鄉閭諸父老杖藜期看馬
卿車

寄謝靳士達分憲過舉遺逸

朱紱銀魚古諫臣紫髯驄馬異常倫百司揚厲風霜節一
道涵濡雨露辰幕靜柘陰高轉午庭深花萼暖輝春臺評
屢動天朝聽社署曾聯宰相裊雲路久隨鵬直上泥塗今
見蠖初伸行囊何有惟書劍歲晚相携願卜鄰

毘陵秋懷

有後序

老兵爲說劉都統起坐舟中思滿襟玄武城危寒日短紫
駝塵暗朔風臨江山不盡新亭淚天地長懸即墨心宋祚
未移中道死至今劍井蟄龍吟

至正甲申秋八月逢金陵歸泊常城下有老兵能道劉
都統事劉名師勇山東文安縣人也少英銳涉獵經史
包恢平長興盜師勇與有功授都統制守濠至元十
一年王師渡江遇常州時宋德祐元年也春三月知

格溪集二

八

州趙汝鑒遁通判錢彬以城降與宋鑑師勇前已入衛

至是與都統王安節殿帥張彥受命克復之以姚訔知
州事因共樹柵鑿壕爲扞禦計夏五月安節自呂城出
迎王師戰不利彥尋以衆降且迫彥招訔訔罵曰若食
國厚祿不能死難反說我即狗彘辱吾唾冬十月大軍
圍城數重宋丞相文天祥發兵來援連戰不利降臣呂
文煥射書入城諭以禍福流矢中之文煥怒白伯顏丞
相建鈞援之屬晝夜力攻餘五十日師勇登陴累創拒
戰且曰吾城即破金山長矣丞相因識其語命昇金山
寺沙門問計沙門實無計諉言城狀如龜擊其尾則四
足披露矣十一月用馬牛革爲屋以蔽矢石趣死士相
銜輦土填塹灌脂砲中焱焰栝發急攻南門城遂陷訔
戰死安節被執終死不屈師勇從八騎手殺哨騎數十

百人易其衣甲以混北軍裨將張超墜馬師勇斬其頭以給衆曰亟追劉都統所向披靡得從間道赴行在扈二王入閩至紹興憤懣疽發背卒江陰孫謨所傳亦然特少異耳師勇嘗經江陰悟空寺時烈寒冰血膠手湯解之射一箭于寺塔意氣慷慨復題詩于壁乃去孫能記誦之或曰國初吳城外僧舍有一老僧長七尺許居十餘年未嘗面北坐人詰其姓名輒不答死之日僧開視其篋笥有師勇官誥豈其人耶抑其騎士耶不可考矣逢論曰趙宋苟安吳會奸臣擅權國以殄瘁

天兵所臨望風渙散襄陽一文煥以孤軍抗守六年卒以援兵不至而降失江漢蔽因以危亡師勇與嘗智勇足以濟難職分所寄僅得收復一城率創殘之卒以禦百萬之師雖古雄烈蔑以加此嘗之死綏亦足愧死汝

鑒彬彥之徒矣師勇智略絕人其軼出重圍可謂驍將戰之不利天也扈王入閩猶昔人即墨之志事之成敗君子有不論焉文丞相嘗謂滿城皆忠義鬼是誠德化所致若安節出處大略視強毅不屈凜然有烈士之風嗚呼偉哉

送任子羽赴太醫院辟

天醫臺院五雲深曳紫腰犀雜珮音中使日供駝背酒六宮時賜裏蹠金丹砂鐘乳來南國赤箭青芝滿上林知爾去鄉承薦剡贈言慙比太和箴

寄謝貢司業枉訪

碧雞坊裏皇華使沉香亭前宮錦袍五月江城駐車轍百歲野翁觀節毛不及將迎具茶果應訝環堵翳蓬蒿至今驪珠照篋笥夜夜令人竟夢勞

贈顯上人

陰陰萬木蔭孤村，雞犬無聲日閉門。
河海自隨儒化遠，山林惟識梵王尊。
石潭龜上青蓮遍，玉笈蟲書貝葉昏。
偶說漢家來白馬，欲從葱嶺訪昆侖。

夜宴葉氏莊曉登悠然樓作

百尺飛樓俯碧湍，六峯秀色遶闌干。
杏花落盡東風惡，燕子歸來社雨寒。
夢裏香煙生繡幌，酒醒紅蠟膩銅盤。
一春樂意朝來好，千里家書席上看。

送朱自明辟閩憲奏差

閩中烏府小清都，列郡山巒紫翠紆。
王化直來天北極，文星多聚海南隅。
暖塵花氣隨驄馬，春日榕陰滿鷓鴣。
况有翰林持使節，時歐陽學士除閩使憲即應得效馳驅。

奉簡劉澹齋總管

南極高天動壁奎，青山落日夢金闈。
花間春並連錢馬，竹下晴看吐綬雞。
漢室二疏遺跡在建安，諸子大名齊闡干。
角畔梧桐葉吟得，宮詞細細題。

送吳伯顯遊武當山得試心石命題

紫霄之巖千仞高，上有一石懸根牢。
劍客無地露肝膽，肉身昔年生羽毛。
北極虛厄夜氣肅，中州豫雍風物豪。
送君此去攬神秀，應鄙望夫雙眼勞。

夜宿宗陽宮簡俞明元縣尹時自德興棄官將歸吳門

六月仙家冰雪壺，一簾荷氣簟紋鋪。
圖書天府占東壁，道

德清光揖老儒五柳傳，成超晉宋三苗民。
化樂唐虞公嘗

湖帥歸舟誰盡傳，經禮玉珮金魚擁道隅。

奉題先世所藏嚴子陵小像有後跋

千仞臺臨七里灘羊裘鶴髮老魚竿客星帝座分天象穎
水箕山並曉寒遂起後塵甘黨錮尚存餘烈愧南冠桂叢
萃尊嶺花薄悵望高風一羽翰

客星犯帝座當時天象已示光武之爲帝座子陵之爲
客星太史又奏如此雖讓萬乘位與之不屑也博士范
升之奏固謬拜子陵諫議大夫其大失歟然則子陵蓋
巢許其人也

題馬洲書院有序

馬洲書院者孔聖五十二代孫元度昆弟之所建也元
度五世祖若罕高抗不群長於春秋當宋南渡自闕里
將之衢留滯泰興見河流達南江詢之老人曰此龍開
河也西北通淮泗因歎曰吾洙泗龍泉之支流其在茲
乎遂築室河上與其子端志各授弟子業從遊日衆乃

有菑田百畝人助以力官復其稅戒子孫治生勿求富
讀書勿干榮邑大夫嘉之易名龍開河曰敷教示崇化
也年六十卒葬河之陽端志克守父道薦辟悉不就淳
祐元年冬邑燬于北兵元度避地是洲咸淳間書院落
成教授復如初然皆無後今崇聖寺旁惟破屋蔓草遺
像瓦爐而已逢懼變遷殆盡故叙其槩于壁間庶胡王後
之起廢者得以考焉詩曰

科斗秦皆廢靈光魯獨存豆籩漂海國丹雘暗淮村苔蘚
花侵礎蒲蘆葉擁門青春深霧潦白日老乾坤德化三王
並威儀百代尊郊麟初隱遁野兕遂崩奔先輩俱冥漠諸
生罷講論斷編塵樹冷遺像網蟲昏盡變衣冠俗終歸禮
義源江南游學士瞻拜敢忘言

送郡知事李仲常還金華

列郡歌岑旺孤城頌李膺文華仙掌露人品玉壺冰畫本
黃筌學詩兼畢曜能關河千里道風雨十年燈薦鷄知無
忝登龍貴早承翔雲低紫禁東壁映青綾卽署新帷幄儒
門古豆登龜梁初隱見羽檄遂飛騰軍事諸曹服元僚太
守稱芙蓉秋獨卧驃騎日同興衆仰寬民力誰堪作帝肱
掃除塵瀆洞屏蔽雪侵陵野戍銷鋒鏑田家罷棘矜昆侖
天柱正宸極泰階升顧此心常切多君興遠乘崇桃紅霧
斂豐草綠波增喻蜀漢司馬歸吳張李膺宦情輕比蛭行
色澹於僧三洞金晶發雙溪白練激過家饒賞咏來紙細
緘滕

奉題薛茂弘所示張仲舉丞 旨藏經序銘後 序銘附

北斗道經一卷故太史清江范梈所書貴溪薛毅夫奉
而藏諸禹穴承母命也母倪姓諱瑞真世大族生於至元

格 卷之二

二

之庚寅生之夕父母睹北斗光燭于庭故長而事斗極
虔日誦其經年十九歸薛昶昶蚤卒時甫三十孀節
卓偉訓毅夫詩禮爲名士毅夫一日過清江謁太史告
以故太史爲書經俾之歸遺母母得之喜曰比夜夢汝
執經我側今致此非偶然也吾百年後可藏諸名山慎
毋忘暨毅夫終母喪乃上會稽詣禹穴藏經已而屬太
史氏襄陵張翥爲之銘銘曰禹陵之洞陽明虛中闕玉
匱遁甲圖孰敢窺之神所徂有孝子毅精誠孚斗七宿
經史掇書玄默攝提月在如翥也作銘古作謨歷厥世
百文弗渝後有道者其徵且

薛母高門女生時斗燭庭紅顏斑竹淚白首葢珠經鶴遶
香千匝龍辭海獨聽妙音遺杳眇陰德著幽冥月墮朝朝
鏡雲生夜夜軒翰林留製作禹穴護精靈地接曹娥廟天

低婺女星輝光同百世事跡有餘馨

送太常奉禮郎劉仲庸以二宮命使南省織金段龍
帳還京師二首

澤國李膺舟風霜季子裘家依南越鳥身適大宛騶甲乙
帷虛夜蓬萊殿啟秋到京王母喜休語萬方憂

秋風吹葳薇宮使別鄉闈中夏蒼黃色孤舟錦繡輝勾驪
龍畫偃瑤水鳥雲飛萬一回天睽均裁大布衣

辛卯仲冬廿四日吳山游望

虹霓生海國薄暮太陽通徑掩廣寒殿橫經長樂宮暈浮
蛾黛綠氣襍蜃樓紅願得爲龍袞端垂我 聖躬

鷓鴣

蒼莽炎洲地生成五色文不司天上曉常吐日邊雲孔翠
名雙重鷓鴣鸞類孰分祇宜駭巨室切莫誑明君

藤

梧溪集卷二

十三

詰曲紫藤樹檀欒蒼葉敷時時上蠅螟夜夜走鼯鼯雨露
不偏沐風霜先自枯深求造化理重笑水中蒲

送靳利安之常州同知經橫林洛社舟中二首

金湯遲建節班白半爲魚煙冷漁商市霜晴鳥雀墟丹心
憂國遍畫舫上官初素著循良蹟綏民早駕車

敗水流滿川茅舍啄烏鳶垂喪期願老猶傷乙亥年亂離
今日繼風俗幾時遷洛下衣冠族宜先解倒懸

感宋遺事二首 有引

支漸資陽縣民元豐間母喪躬負土葬賴錫山中廬於
墓側布素糲食而已日三時號慟有白黑雀各雙巢墳
松間斑狸白蛇兔每自山下來顧視漸久之方去又有
白鴉及五色雀千萬餘圍繞縣令以聞敕特賜粟帛

支漸元豐士浮沉四百年孝曾蒙帝寵名復待予傳白兔
歸蟾窟青松合墓田感懷龐禮部不忍釋遺編

高處士名繹長安人有古人絕行慶曆中召至京師欲
命以官固辭歸山特賜安素處士家貧妻子寒餒鄉人
或饋以財終不以困受閉門讀書而已昔王霸憐其子
蓬髮投米愧卧不起前賢之所難處士蹈之有餘裕也
嘗見古老說种放隱終南山召拜起居舍人賜告西歸
有一高士隱居三世以野菽一盤詩一篇贈放云接得
山人號舍人朱衣前引到蓬門莫嫌野菜無多味我是
三追處士孫放國史有傳若夫志意脩則忘富貴惟安
素可以無慙矣南安龐元英文昌錄中所紀如此英嘗
爲神宗儀曹官

長安高處士氣得伯夷清安素承殊渥歸來遂隱名雪寒

梧溪集二

十四

深屋卧雨夜一經橫太白鴻飛濶思瞻紫翠晴

塞上曲五首

木葉滿關河轅門肅珮珂將軍提劍舞烈士擊壺歌月黑
輝銅獸風高嘯紫駝不堪城上角五夜落梅多

將令傳中間交驩決兩軍地形龍虎踞陣伍鳥蛇分清野
輝燕日黃河瀉岱雲生靈如有賴絳灌不無文

月照小長安風生大將壇虎皮開玉帳牛耳割銅盤霸氣
寒逾肅軍聲夜不驩皇天眷西顧慎取一泥丸

倏革帶鈎膺聯鑣獵楚陵白肥霜後兔青沒海東鷹千里
榛蕪闕三年和穀登中郎示閑暇呼酒出房丞

諸夏皇威立三邊虜氣衰角弓分虎圈乳酒下龍墀蠶午
歎氛遠鼉更窟宅移輿圖欲盡入中道勿頌師

聞武昌廬州二藩王渡海歸朝

茅土分封在金章渡海歸事殊生馬角心愧著戎衣星月
晶光並山河帶礪非秋風紫塞上依舊雁南飛

贈李宣使

秋水淨菰蒲天風送舳艫海雲紅日近江國使星孤帝運
無盆子戎行有亞夫傷時恨離別林下重咨諏

和張率性推官小游仙詞四首

西王春宴百娉婷玉碧桃花滿洞扃自飲一杯瑤屑露東
風吹夢不曾醒

銀河澹澹月輝輝洞草巖花夕露微笑踏青鸞作龍馬九
天涼動五銖衣

雲幢煙節紫霞裾齊御冷風集步虛若受人間塵一點長
門又屬漢相如

雙成今是五雲仙得捧長書玉帝前天上星河春似海人

梅溪集二

十五

間風雨夜如年

登雙鳳普福宮東樓贈吳道傳時周境存隱君同席
道人獨坐覽輝樓海底青天入座流燕子飛來又飛去游
絲掛在玉簾鈎

樓殿岩堯上赤霞水紋蟠鳳卧靈槎石棊盤靜香煙直簾
下雙頭百合花

題王若水墨鳩

澹竹花開碧草叢日暄風靜見沙蟲鶉鳩不忘相呼逐偶
與孤臣飲啄同

送堅上人歸省

高堂鶴髮不勝簪大地叢林已遍叅好去雕闌認春草草
中萱是舊宜男

題焦白所畫其父奉禮府君夜直詩意圖有引

憶昨停驂便殿西柳溝風軟絮霑泥一彎月子梨花上
冷浸香雲伴鳥棲右社稷署奉禮郎焦君追念先朝
眷遇之隆而作也君諱文炯字仲明淮陽人也少通敏
由文皇東宮時說書爲前職而卒白君之次子也日
誦其詩尤拳拳孝思不忘于心乃手寫詩意圖屬予和
其上詩曰

露濕金莖月轉西披香太液淨無泥
黎雲散盡千官影獨見桐花小鳳栖

題林芝隱所藏龔翠巖臨昭陵什伐赤馬圖龔詩附

翠巖名開宋李淮陰人自題云赤驥馱僧去玉關換他
白馬載經還誰憐什伐蜚龍子贏得金劊卧帝閑

風雨昭陵戰伐秋赤流汗血尚成溝
畫工解貌千金骨不抵東家牛戴牛

香溪集二

一六

題馬和之園有桃詩意圖

華髮無情賦黍離何堪畫託衛風詩
漢皇日宴西王母合賜東方酒一卮

避地梁鴻山六言四首

舍邊新花夜合井上老樹冬青
孟光齊眉舉案倪寬携鋤帶經

三百銅錢斗酒一雙蠟屐千山
莫問雲浮富貴且消天與清閑

北里戎衣袴褶南鄰墨勅斜封
多我幽居水竹有誰高卧雲松

風塵涉五六載忠孝錄數十人
已判詩移白日更須藥駐青春

重題余常清雲林四首

花搖暖溪雲蘿裊春嶂月高坐無來人清琴數聲發
葛巾洒風涼桃笙卧月色意行嘉樹林濃露如雨滴
鶴鳴山館晨魚跳野塘午如何涼已深菰蒲數聲雨
積雪歌巖松回風簸溪篠道人不知寒焚香坐來曉

秦孝友先生迎享送神辭

有引

先生諱玉字德卿少游之裔受學于蛟峯方公隱居崇明淑
門弟子若干人先生卒門弟子以行業私謚孝友請祠于州
庠其子崇德儒學教授約徵迎享送神辭于逢辭曰

海東隅兮三洲宅鼃鼃兮蛟龍湫羌聲教兮邈悠靈斯藏兮道
斯脩道不行兮長邁祠學宮兮子孫永賴日薄渚兮風林鳴如
聞音之馨歆楚葵青兮靡靡牲甚肥兮酒甚旨皎白駒兮焱馳
儼衣冠兮戾止有聖賢兮依歸川魚泳兮鳥雲飛靡潛伏兮弗
昭著靈自今兮欽孰違

維杭美沈省掾從董參政出師有功沈名兼善

維杭大藩阻江負山千秋獨松昱嶺其關草風則塵潦水則瀾
帝十二載民脅冠蠻遂據天險遂肆冥頑相命董公以靖以安
公威巖巖公師桓桓公佐孔文弗猛而寬曰彼霜露天用戒寒
非寇倒戈胡寧野丹民信不疑駢壺聯簞市如其歸堵如其觀
既肉我骨復完我殘昔顛而飢今坐而餐羊牛雞豚亦充于闌
社賽廟享鬼神具歡佐我父母公我王官匪父母私佐才實難
溪激其湍嶺業其盤陵夷谷湮德功不刊

復三關美沈都事

帝十六載盜起昱嶺蚊蚋全入螭螟附逞黔黎煽變郡縣傳警
相臣先見兵且徐整乃詢于奎乃咨于省僉謂沈公遺愛是境
俾佐廟謨往則綏靖公勇承命星駕露舍有單其童有隻其馬
扶携僞旅叩首馬下始公未來龍蛇草野及公復來雞豚井社

冥頑不靈陶之坯冶顛連無愬庇之大廈摧輪于歌蹶躑
于危王良韓哀安乎驅馳既貸以生又訓以辭常人之恩
僅止父師鯤魚躍矣必遨天池欲祝之福有詔在遠重關
峻厓含精曜曦勒茲頌言永我去思

望江郎石

仲春天氣佳萬象忻改色我行六峯外遙見江郎石二儀
闢渾沌牽牛委晶魄鼎列台輔姿玉蘊珪璋德三神浮瀛
海噴薄東一極鉅鼇因戴之仙宮晃金碧斯連厚坤軸乃
棄姑蔑域直上青蓮花或隕樵舍側安知非異境自與三
神敵于時攬深秀雲霧忽巾翼微風稍飄颻空翠疑亂滴
雜英敷陽艷嘉木生午寂交交黃鳥音好在千丈壁三年
思晤對百里今咫尺煙波動落照道路陰已夕尚戀女媧
功躊躇望西北

周處讀書臺

偶遊鹿苑寺遂登孝侯臺當時斬蛟虎折節事賢材詩書
夜繼日奧義旋兼該篝燈委紅地掛劍蝕青苔默語三十
篇若出造化裁純誠被幽魄勁氣懾上台翹翹毋望深急
急將命催孟明哭蹇叔子路死孔悝天不卹忠良寧馨真
禍胎吾儕千載下野衲相徘徊秋原風藿慘夕殿薌花開
白馬從素車恍渡秦淮來故都凡幾姓醜地餘劫灰此臺
異呼鷹靈光共崔嵬私傷過英武不得盡奇才

送篤御史自永豐遷生母縣君墓北還

春城澹欲秋晝日黯不輝諫官素車馬南州護喪歸歸程
數千里居庸山光紫野桑鳴雉敷津柳巢烏子時清無虎
豺薤露歌徘徊生芻豈無人親戚羅上台淑魂久鬱鬱今
得歡從匹牲碑凌雲霄墓道臨警蹕爲母有此郎百世餘

耿光願言移孝節終始奉君王

題程員外撰汪夫人傳後傳附

弱齡身服苴盛年髻束髮孤生况新寡不謂壽命遐墻陰
斷腸草墻外合歡花哀榮異本根且復藝桑麻桑麻日以
長雨露日以養夫幸從弟賢命子承祭饗洋洋靈在天蒼
蒼天在上忍爲奔月娥冥心共泉壤

夫人名悌婺源下港里程昌文女也四歲父死于兵事
母汪以孝聞伯父草庭先生憐之選嫁名家子汪德裕
生一女而寡公姑懼其不能安也使問之對曰妾不幸
夫亡尚幸公姑在得脩奉養何忍更適人或勸之曰夫
人年少無子不以此時從良人後將何悔夫人曰吾聞
女不事二夫夫天也天一而已天死而遂去之是背天
也背天不祥或又曰夫人今嫁幸而有子不猶愈於持

梧溪集二

十九

孤身托冷室乎公姑固不汝望也何乃自苦夫人泣曰
雖然吾父蚤世吾母守志數十年至今吾身一爲汪家
婦也知死汪家而已奚恤其它里之富人因媒妁具聘
幣伺間以請者數輩夫人卒不許家貧紡績自給課童
奴樹藝歲時奉祭祀如夫在時公姑卒喪葬盡禮今年
七十餘矣老猶執女工不倦閭里姻戚稱夫人之德無
間言初德裕從弟澤民幼附夫人夫人子畜之及澤民
長乃立其子梓爲裕後以奉夫人梓事夫人益孝謹如
實生已程文曰予從閣老著書睹春官旌表節義事甚
悉率多京畿內郡之民間閭幽遠蓋罕焉及讀陳助教
繹曾作夏侯王珍傳許汧卿善錄載許伯冬妻頗與汪
夫人類皆節義卓卓羽翼名教朝廷著旌表之令以風
勸天下而有司莫之省使志行湮鬱不顯白於世悲夫

予弟爲平江幕官嘗言某帥妻詣官自陳願上所受封
比齊民得再嫁嗚呼以禮防民猶有踰者若是哉予故
論著汪夫人之事以俟察民風者覽焉

題華亭呂氏伯仲德恒德厚市義卷

百里不販樵千里不販糶君家獨市義人用羞貨殖璜溪
流湯湯闔境咸飲德頌然先處士首倡扞寇敵生死肉骨
餘老稚仍仰食時平條脩逝二子承世澤焚券責報天焉
計鉅萬石田文昔舉此史稱多賢客豈若伯仲間惠施本
心臆我浮五湖舸撫卷增歎息日青野蒼涼靡靡新煙白
昔如鹿犄角今比烏戢翼襁負歸流亡來游復阡陌官曹
得公輩自足蘇民力重懷吳泰伯三以讓去國淮南尺布
謠同氣有遺戚贈言廣孝愛福祿將永錫

贈錢掾袞

錢塘錢慶餘系出吳越後眉豐目秀廣質曠氣冲厚家乘
久壙僚青氈遵世守放膽論道義小心取升斗晨昏曲奉
養及親未白首親終表其墓翠琰照林藪宗弟爲人奴恐
辱大父母贖歸故閭里甘苦願同受孝誠出天性薄俗所
未有兒也弄文墨婦也躬井臼衣冠俎豆間揖遜動曰某
千年不平事醒醉常在口鎮西陸將軍遜廟食采地久淞
人媚淫祀加置神木偶上疏乞去之以時致牲酒豺狼恣
跋扈鷹犬迫飛走衆方立殊勲而甘伏田畝行藏悉無愧
所愧寡知友竹光青連榻蘭艷綠當牖篇詩涉教化每諷
賓客右我嘗駛風帆卧數峯過九鱸尊一水外念子非狗
苟遭亂顛躓餘始得屢握手高盟沮金石雅興謝塵垢偃
蹇七尺軀相視覺老醜春芳到鶻鳩生意付蒲柳勗哉令
善名是則窮谷叟

觀錢塘江潮時教化平章大讌江上

蒼蒼吳越山對峙東江腹江開白銀甕一浪天四蹴金晶
王高秋風露氣轉肅常年駭壯觀委巷雷擊轂今年官增
威旌麾被川陸羅衣繡龍鳳玉帶瑒蠶粟牙床錦屏帷蠻
毯隨步蹙温温香卷陣婉婉眉鬪綠微聞伊梁音淶酒光
動穀鮮醲片餉盡望姓空側日懼成庾郎哀竊效杜陵哭
冥頑鱷魚彙屢覆舟萬斛梟雄扈將軍謂福建扈竟作机
上肉大侵交烽火血齒腥草木地媪爲之愁兼恐河源縮
孰聞靈胥廟歲祭莫敢贖三叫三酹觴願與赤水族錢王
射强弩至今有遺鏃何當起英魂少助八州督時汝潁中
原日無事海寓蒙景福尚虞多戕殘灑淚逃亡屋

月夜醉歸舟中二首

推篷滿船霜長嘯仰見月清光溢懷袖披拂青燐滅身不

在隴頭無救水嗚咽

冰田一萬頃龍魚舞空明醉坐大蓮葉水底招台衡台衡
光遠却散髮自吹笙

題觀瀑圖

中天瀉雪瀑清氣涵澗谷餘濺落人間猶作珠萬斛負手
者誰子於焉送遐矚

天池石壁

翠微蓄天池白晝積水黑窪涵南斗天峽東太古石初月
猿下飲先雷龍起蟄濯足者何人袖中有溟渤

鶴山下厲老人餉研墨草

老人餉墨草殷勤貴適口形微桑上鷺味勝杞下狗山肴
雜糲糝瓦盆注醇酎問我兵興來此樂可曾有

觀兵婁城

震雷過高城草木咸粵榮大江流春氣一雨暢民情靡靡
冠蓋會蕭蕭車馬鳴無勞漢天子係虜賜長纓

古從軍行七首

少年快恩讎辭家建邊勲手中弄銃覘目空萬馬群轉壁
入不毛水咽山留雲檣還親撫哭悔識李將軍
義結豪俠場日趨燕趙風攻城數掠地帝賚主將功玉帶
十毬馬金鎬雙解弓弓馬分賜誰赤脉干綠瞳
大旗蕭蕭寒長檠列萬夫令下歛邏鳴鐵騎分四驅塵黃
日黑慘相視人色無鋒交血濺野首將方援袍
白月流銀河三五星芒寒牛馬卧草上帳幙羅雲端鐔鼓
春容鳴衆饗獨鮮驩群虜在吾目九地攢吾肝
彼虜或有人我師豈無名上計貴伐謀掩襲非示征草塞
狼反顧一水西流聲寇恂斬皇甫餘子烏足程

卻穀敦詩書祭遵事雅歌非才銜空名覆敗誠不多小范
真我師匹馬雙導戈笑擁兵十萬夜下白鹿坡
大鈞播萬物無言自功成酈生掉寸舌不智遭鼎烹非熊
爲王師飯牛慚客卿轅門鼓角動整駕河漢橫

攄懷六首

陰風動長淮噴奮三江澹羈人滯中谷鬱鬱憂彌臻躑躅
就長道延企望清塵吳天回銀河魏闕直鈎陳西來一黃
鵠翼欲覆八垠中焉離贈繳孝鳥共悲辛南服奠會稽西
江導岷岷休明始華夏攬轡諒有人
促織嘖嘖啼布穀交交鳴士無濟世念品庶同每生陰陽
運四時日月麗太清如何流離鳥卒不反善名滄江增深
波黃葉委前榮漏半笳始寂嘒彼星東橫天命自阨窮民
情何怔營懷哉古大聖待旦整朝纓

大星動欲落草木氣含霜驚風薄前營步騎勢翕張美哉
同心友劍珮相徊徨游鴻噉荒傲冕兔竄崇岡旁顧阻太
湖不見舟與梁苟容諒非道單居念流光寒菊已復花蟋
蟀鳴我床結交兩憂患夙好終不忘

征塵一何黃征衣一何素衣素易染塵况復冠帶具忽忽
葉變秋灑灑草溥露莽莽關山長悒悒歲月度豈無新相
知戀戀情如故范叔未至寒綈袍受良難

曜靈升扶桑萬彙希朝采故山互蔽虧新陰復晦靄楚楚
園葵花傾心若爲待凱風幸時拂天道從小改客有採珠
人遠渡鴨綠海歸懸雙明月家喪踰十載兵烽何日息素
念無時怠引領望反照桑榆四三在

猗蘭生窮谷偶與惡木鄰惡木集鴟鴞一旦摧斧斤歸人
白日晚躡履盼餘春滋露留古艷好風薦幽芬東君義相

望大夫惡得紉大夫紉秋佩卒染清路塵九節石上蒲服
食足葆真蒲也真自葆蘭甘谷中老

題梅花士女

彼美空谷人梅花是前身手披先天易心融大地春素衣
杲霜雪孤根堅石鐵不夢趙師雄長終抱明月

往敷名開化二鄉掩骼

分藩多賢勞不敏忝賓客雖無官守縻亦復與言責二鄉
虔劉禍慘甚長平厄先王制禮經孟春當掩骼僕夫有難
色款段纔任策駸駸度岡坂眇眇循藪澤稍稍煙微青歷
歷野四白游魂行草上遺老候道側我豈物役徒茲來出
心臆皇天以下憫赤子非寇敵鴟鳥何不仁啣啄血更瀝
因歌戰城南風悲淚狼籍

題沈氏死節卷有引

沈茗溪邵婦艾而美至正十六年爲淮兵所逼投水垂
死今浙省都事張英適過之命其下拯救得活且諭曰
汝配張官人不榮幸乎沈謝曰幸諸君活我我以夫遇
害知殉夫而已他忍聞也既置舟中夜四鼓陰納束筯
口中面舟木觸喉而死張葬焉

黃金無留礦白壁難混瑕坤裳義安貞適然暗塵沙寧死
嗚咽水不望昌蒲花感君固存妾妾命薄如葉此心許所
天羅帶難再合君殊野鴛鴦妾非鬼胡蝶清風何搖搖吹
彼溪上茗山光淳蒞佩空響度瓊簫至今一抔土民自戒芻樵

題福天然開士水木軒

軒榮彌清華一水帶嘉木幽光湛深黝餘潤裛高綠名緇
結長夏居然媚孤獨春辭灼灼芳日冷踈踈煜雲行天體
卧境靜物理燭時諷霞上篇遠縱林下躅本源苟途舛文
字徒形楷我來兩忘言山童報茶熟

題鄒伯常雲文閣

齋閣嘉樹寂幽徑綠苔滋美人琴尊暇焚香聊自怡天
書譎詭篆峯回裊窕姿因花紅變霧度草碧縈絲鵲尾
黃金鑄螭頭紫袖携神徂榮願俱意適清賞隨踈漏下深
迥餘馥尚委蛇宴安諒加儆移以奉親知

題黃常叔彞友古齋

彼美特立士素爲鄉里欽蟬蛻謝汗濁鳳歌邁遐深宿雲
曉承宇洄溪日循林囊餘不琢玉壁有無弦琴琴貴長蘊
古玉貴弗售今羲皇陶所慕管樂葛同心是山出地中來
者仰崑岑聖緒存著述試扣鴻鐘音

過楊員外別業有序

至正十六年今大府開中吳時公先以杭州陷非罪破

黜依故人彰德路同知上海章元澤居或傳大府將起
公笑曰吾豈事二姓使果至公知不免往辭章曰某行
矣敢以家累君章曰友責當爾也既歸誨二子曰卓事
君立身之道乃就寢久之曰卓入見則縊死矣按上得
遺訓云死生如晝必有夜何足介懷吾老矣獲全臣節
死固甘心曰卓其以麻衣履爲斂歲時祭止蔬食此蓋
晚年至願曰卓益宜脩省勿遺人誚也章殯之公名乘
字文載濟南人少負氣博涉經史由參議府掾累官拜
監察御史遷浙省員外郎十八年中外臺臣昭雪其前
後事贈某謚某曰廕山東宣慰司都事卓清忠書院山長
翠羽無深巢麝香無隱穴由來老蚌珠淚泣滄海月於乎
揚員外竟類膏自爇憶昨佐南省四境正騷屑朝廷忌漢
人軍事莫敢說遂罹池魚禍端被柳惠黜寄身傍江潭乃

心在王室星躔錯吳分氣候乖鄒律天風搖青賞徒步空
短髮譙玄初謝遣龔龔勝終守節譬如百鍊鋼不撓從寸折
又如合抱松豈藉澗底孽我時浮扁舟鷗外候朝日荒郊
無留景別業自深鬱時清議勸忠公冤果昭晰大名流天
地當與河水竭結交曰卓間遺言見餘烈

三孀詞書陳衆仲監丞傳後有引

相人李柔母陳兄嫂王王之女咸早寡守節里稱三孀云
相州城中三羈雌相依相呼李樹枝青春雪白花照帷淚
痕點點鬢絲絲鬢絲日夜短淚痕無時斷將影對孤月同
虧不同滿鸞分忍聞膠可煎舊御尚掛鴛央弦一門孀居
天使然辱天何敢况辱先生當同室死同穴史筆遂屬陳
莆田嗚呼歲暮空谷裏佳人無媒垂老矣

徐本童權陳濂三友陪遊飛來峯還宴濂面峯溪堂

東南名都萃炳靈山出萬朶芙蓉青其峰飛來最嶄絕見
之身欲生羽翎金晶蘊結天地秀石樓盤困巖洞局風高
力鬼負鰲極月黑毛女捫牛星時維奔雷急雨歇澗合源
泉魚藻活數聲清磬猶嘯外百尺浮圖鶴巢未重江複湖
氣溟濛陰嵐晴霏翠轆轤挺拔多異材可望不可識得非
共命鳥啣種自西域古松曾經尊宿坐怪藤一似蛟龍踣
三友今日無凡憂探竒覽勝忘少休鏘然衿珮崖壁面咳
唾散落空中漚傳車官馬素不到到此乃是高人儔牧樵
往往說題誌焉用某職煩雕鏤人生貴富如雲浮乘興再
登雲上頭桂香載道酒波瀉還坐大床酣宴秋於乎安得
三友爲我常追遊

北丘畊隱歌贈斡山謝逸人

九山西南來斡爲北道主鬱積氣饋留盤礴秀鍾聚神

蘇詩卷之二

十六

丁剗却蓬萊股一鰲首戴奠茲土平原內史曾未覩崑陰
谷陽僅容與謝逸人者晉相孫玉樹其皎天球溫素歆李
渤栖少室近比杜甫居東屯大田穰稔橫跨泖高埭楊柳全
遮門有作古詩好有釀新酒渾酒從席帽醉詩對鐵笛論
鐵笛謂楊廉夫提舉月下蘿萋嘗同捫風露響落秋林根崖顛夷曠
擬築卧游閣泉竇寒冽願鑿杯飲尊頻年目苦兵塵昏長
材美箭無幾存雨花洞鎖白蝠舞試劍石泐蒼精奔蘓吳
爲沼亦復見龐公遺安良可羨自今三老雲霞交他日無
勞真隱傳

新舊庵辭

新庵丹堊輝庭戶舊庵四壁穿風雨新舊庵僧自相語新
者父葬舊者祖誦誦玉珮紫金魚青松花開笑殺渠

連環歌有序

連環歌爲杜先生夫婦而作也先生諱友開字陽父世居江陰之君山教授數十年資束脩自奉妻吳辟纊以助之天曆間菑荒學徒散去先生竟餓死初吳昆弟屢勸斬立木粥墓地可少延性命先生在羸憊中堅持不可繼欲挈吳以歸吳曰夫既盡孝妾獨不以義自處寧不食若粟遂相枕藉而卒後十一年逢過其里獲見一古研乃先生故物其銘曰置之而水凝淒然其似秋噓之而露滋熙然其似春惟有德以自潤能不言而詔人何以觀之吐墨如雲觀此益信其行噫先生之計善矣當是時穀價踴貴人食樹皮糠覈非困於飢則殆乎殄矧二者罹於垂老待盡之日必料丘木與墓地不過易斗斛粟活旬日而死寄客土且身受不孝之名尚從父母爲地下遊乎先生卓然先見者以此吳生爲士妻共患難同貧賤道也夫既委順於正又肯愛餘齡就食昆弟哉抑以昆弟之言非導人歸於義者也吳判然不移下從良人者以此噫亦義矣哉使二人有裹飯一君子則天理人倫未必章章鄉里况天下耶逢懼歲遠而事泯也故序而歌之歌曰

白玉雙連環瘞在春中山山前夫婦義同死心與連環鎮相似日月合照無欠虧天地相依共終始天地日月非彈丸環兮環兮冰雪寒

張春兒有引

張春兒葉縣軍士李青之妻也至正戊子青病革時年甫二十青曰吾殆矣汝善事後人張截髮示信曰妾生寒門頗曉夫婦大義萬一不諱惟有死耳青卒哭之垢面流血且喻匠者造大棺將盡納其衣服劍器匠如其

言既歛張自經庭樹下閭里遂同葬之有司上于省旌
其墓復其家獨未有形容其心者故予補歌一章

紅顏夫婿羽林兒汗馬未騎身早萎娶時衣裝不忍見及
將殉葬心思徧衣裝憑妾得歸土妾今無從苦復苦誓爲
月魄入九泉長與地下夫團圓

憂傷四首上樊時中參政蘇伯脩運使

古青徐十連五屬桑棗墟黃河失經人化魚呂梁設險豺
爲徒船多纜通玉帛貢車多始登牛馬途守無官軍法度
踈居無鉅室城隍虛欲去鹵掠當何如合置官軍郡縣古青徐

歲久致君心煩紆

竹笠黃

時海寇戴竹笠以拒官軍

黃金兜鍪勢相當兜鍪本居大將壇

左劍右印增威光邊隅將校望塵拜州縣曹佐聞風僵况
從元首授元柄稍忤言意違軍令不因苗疫自焚船那致

生靈輕隕命竹笠黃兜鍪相當難走藏兜鍪日晚先戎行
官柳場青茫茫野鷹交飛撲馬驟年年十月轅門張元戎
始來坐虎床翼舒箕哆魚麗行鼓進金退兵家常起伏見
譏孫武子勾卒貽笑曹成王千夫散盡旌旗定偏裨隊伍
相呼應幾處私恩誤主恩一回酒令行軍令酒醉邊隅事
不聞邊隅擾擾多煙氛

江海孺家家浮生多在船船無租出無禁競賣田宅行
鹽錢私鹽漸多法愈密隩裏干戈攘白日尋常惡孽不肯
除本固枝蕃禍非一虎符龍節王者師赦過錄功先自欺
諫臣上疏劾已晚蔓延及今歸咎誰地官合爲弘遠計鹽
價減徵同賦稅盜源既清民瘼除五風十雨歌康衢

送童子陽北上

中天繁星如撒沙婺女獨與金爭華金華山人應星象閉

戶讀書餐紫霞銅盤沆瀣碧於水瑤草石芝蕤蕤袖藏
明月雙驪珠願獻元臣作充耳今年手分五朶雲染成五
色組繡文上期黼黻聖明帝下欲覆幬窮荒民風寒雪暮
陰曠昏梅花江國留兼旬春潮一夜上沙尾拂劍笑問黃
河津黃河動地翻海渾銀漢滉漾通昆侖太行羊腸路九
折不有壯志俱消魂吾王之門虎豹蹲舔舐矐眈毛牲
牲楯郎戟士露肝膽不有意氣難爲倫君才具美合致身
少壯易老毋逡巡商翁佐漢還遁去魯連却秦終隱淪功
成名遂信有在贈言聊識平生親

小七首歌

水精生苗月牙直慧芒披雲電流隙蟄蛇斷尾短草間海
鶻褪翎霜雪色宋斤魯削讓隋刻金錯錐刀豈其敵吳鴻
扈稽飛著體不曾爲主開邊鄙嗟茲神物久泥滓用之可

梧溪集二

二十九

以報國士簷冰卓筋日黯空稍玩股掌生雄風鮫魚室卧
縞帶影長鉞辟易萬雉墉古昔客堪秦王胸幾什翠鳳咸
陽宮由來意氣泰山重命甘燎毛不旋踵誰隳古制鑄小
之佩稱衣冠加珷琫我歌三歎淚滿裾曹鱗豫聶無時無

孫道絢有引

龍江曾見可家藏宋樂府中載縉華鬼仙汝州官妓詞
皆淫靡後讀建安黃雲軒知縣妻孫夫人醉思仙調曰
霽霞紅看山疑暮紫煙暗孤松動霓裾風袂翩若驚鴻
心似鑿鬢如蓬弄清影月明中謾悲涼歲冉冉舜花潛
改衰容前事消凝久十年光景忽忽念雲軒一夢回首
春空采鳳遠玉簫寒夜悄悄恨無窮歎黃塵久埋玉斷
腸揮淚東風殆見孤凰于百鳥群也因表出之孫名道
絢中原人能文詞盛年孀節卓偉鄉族尊之云

白鶴山中雪衣女花靜春移綺窗戶夢逐雙鳧天外飛影
作孤鸞鏡中舞鏡中舞鳴聲悲殘編留得斷腸詞天寒翠
袖渺何所日暮碧雲無限思

丁清風有序

予作衛女引之明日於宋樂府復得一婦人焉曰蜀士
大夫妻丁氏美姿色善詩文自號清風居士宣和間夫
浮家赴闕求調王黼薦丁姓名於禁中時尚文女郎才
慧者多得進於是有意召見丁曰吾夫庶官我非命婦
安有入內見君之禮不敢拜命且謂夫曰君素非貪冒
富貴者何苦自辱題詩汴邸竟不知所如往詩曰西嶺
雌雄鳥雙雙覽德輝陽臺遲雨散滄海會塵飛夜月參
差玉春雲窈窕衣君王宴阿母却寄碧桃歸是日客有
語都城事有感併補一章

河洲冰膠雲塞野林栖睢鳩歸北馬收書驚見雙青鸞蕭
郎弄玉風斯下金水暗侵燕地氛明月長掛真珠裙靚桃
花碧宴紫府雙星在天靈夜語宣和皇帝何如主

投贈柯博士名九思字敬仲

鐘阜天回王氣新憶君扈從入楓宸旋平內難橐弓矢遂
沐殊恩列搢紳元宰或同司雨露史官曾擬奏星辰羽旌
影動宮花日龍鼎香傳禁樹春白馬獨遊絲鞵好縹緲雙
賜玉壺醇委蛇退食收金鑰怵惕存心表翠珉

文皇嘗賜其父江西

提學謙三絕鄭虔親帝許四愁平子舊誰倫僑居暫作

東吳客奉引依然上國賓稔歲葑田饒蟹稻高秋松水長
鱸莖神馳紫塞風生角夢隔瑤池月照裊白首馮唐仍晚
遇青袍杜甫豈長貧明河近望清如洗行駕仙槎復問津
客金陵遇有以茂才異等爲薦者以病歸泊龍灣二

首寄丁仲容婁行所二先輩

柁樓醜酒出金陵病後衣裳體不勝風雨滿江寒
鬣鬣庭闈何處髮鬢髻周璆實不諸侯榻王式虛蒙博士徵一曲
離歌疑客思幾行踈樹隔漁燈

鳳凰臺上酒如川醉擬題詩李謫仙鑿齒已成耆舊傳
真長空覓孝廉船十年螢按書連屋八月龍灣浪拍天無那
病懷兼旅思白雲遙望夕陽邊

遊永壽宮

文皇帝潛邸時幸臨

六朝龍虎氣回春草木均沾雨露新羽葆蓋車雄萬乘金
銀觀闕現三神樓船不見歸童女桂館徒勞立從臣深幸
先皇潛邸日祝釐無乃爲生民

簡謝性源

同是風流王謝家雲萍漂轉各天涯忽逢落日烏衣巷並
立東風白鼻騮蕉葉深杯情潦倒桃花團扇墨橫斜賢人
在位親無恙八月須乘奉使槎

題下砂場丞韓景陽世綵堂時親年八十

桐木韓家世綵堂五更環立珮蒼蒼晚年夢與雞聲遠春
日情無鶴髮長風細弦歌生暖響花交簾幙散清香
聖朝孝治恩光洽兒得焚魚進壽觴

敬題直學士周公書贊先君庫使遺訓後贊附

吾平生持畏遇小事如大事面欺人不忍爲心欺神明
尤不忍爲也右庫使江陰王君惠之常以是言自警其
子逢求予書以爲家訓既爲作篆又爲贊曰人心即天
天即神明一欺吾心天罰是懲允矣王君持心孔平戒
慎於微弗歉弗盈有子克紹學古行清銘其庭訓終底
于成番易周伯琦書

先君遺訓幾經時大篆新承閣老爲三代鼎彝宗史籀泰
山銘刻陋秦斯雲霄上日瞻文藻雨露濡春起孝思鄉里
未歸身粗立搖搖寸草獨天知

題鄒旅雲青山老隱圖有引

青山老隱圖者予友鄒君昔昌追慕其先道鄉先生而
作也先生有墓有祠在毗陵青山門外中書左丞呂公
思誠爲浙憲時嘗展拜祠下命有司禁樵採後毗陵失
守昔昌避地海上欲歸省不可得乃繪是圖復自號曰
青山老隱以示不忘首丘之義予敬題以詩

青山郭外道鄉祠宰木溪毛幾歲時繡使罷伸芻牧禁畫
圖深寓釣游思踈星皓月飛烏鵲細雨東風過子規更有
張翰首丘賦倩予盟露寫烏絲

送何伯大判官辟中書掾從丞相出師

梅溪集二

廿二

丞相興師出薊丘萬蹄千乘壓中州旌旗露濕星河曉鼓
角風高草木秋號令不聞鸞鶴列謀謨初定鬼神愁獻俘
太廟陳歌頌獨有儒曹業最優

送于子實辟淮閫掾

淮海風高急鼓鼙穎州烽起照淮西餽糧幾道通流馬樓
櫓重城望火雞星入夜寒芒角動地連秋暝瘴氛低君今
掉鞅元戎幙肯憫流亡父老啼

寄鄧筠谷鍊師

別後雷巖結構成靈風洒掃四時清經緯白石天人下屐
響青林木客迎萬葉動星幽氣合三花垂露薄寒生鶴雛
長就車輪羽好在高秋載玉笙

題衛叔靜樂靜山房

名仁復七世從祖膚敏宋參政七世祖上達禮部尚書

新營別業遠風埃山綠湖光故故來四壁有時聞葉墜一

門無事看花開圖傳龍馬尊家學冠護貂蟬憶相才巢燕
不隨浮世變將雛依舊拂蒼苔

寄題瑣憲臣萬戶星湖釣隱圖

笳鼓歸來理釣絲星連文石漾淪漪征袍漸喜團花暗小
艇還從細柳維邊地雪霜憐馬革五湖煙雨夢鷗夷野人
不待傳雙鯉鈎出珊瑚寄一枝

和沈掾中秋月

月入高天更漏遲天香消盡桂花枝金晶氣爽飄風露銀
漢波翻動鼓旗名星蟋蟀滿林羅袖濕駱駝千帳笛聲悲
柴門此夜光如練喜與休文一詠詩

送陳昌道北上

江海才名二十年振衣吳楚上幽燕交游豈在夔龍後夢
寐常居虎豹前天入紫微瞻爽氣野空黃落見踈煙從征

早下陳琳檄遂使三軍樂晏眠

題葉子澄雪蓬軒

歲晚天寒雪一蓑滿船書畫壓銀河鮫人室露雙冰鯉神
女峯沉幾翠螺夢裏客星辭帝座尊前小海度漁歌高明
益進中庸學日看東家綠樹多

清碧軒宴坐簡汪文裕學正

萬竹無聲風露微野夫相對遂忘歸琴彈流水神魚出目
送遙天鶴雀飛自煮萸絲同晚飯肯分苔色上春衣廣文
盛說休官好更覺閑情與世違

題夏士文書聲齋

璜溪溪上魯東家四壁無塵護絳紗春水研池窺乳燕午
香簾幙度飛花賓筵優禮同三釜祕閣遺書共五車摠羨
韋賢家教美滿籬金碧視泥沙

題松江府學訓導胡師善遺跡後有後序

春回澤國草青青不見斯人舊典刑守廟義同全趙壁禦
灾心似哭秦庭蝸行藓壁留題字燕入芸帷罷講經百世
祀從先哲後可能無憾久沉冥

師善名存道越人通春秋禮遊吳三十年無知之者晚
益竒頓意晏如也至正乙未冬僉憲趙承禧廉問松江
知其賢命知府崔思誠延之于學善慨然曰吾不用於
世亦庶幾淑諸人明年春二月叛將燔城善親冒煙焰
籲天呼地願捐生衛廟學俄大風返火未幾參政楊完
者調苗丁來守墮掠尤甚善語同舍林以莊宋處元曰
諸侯死社稷吾儒視學校毀於兵可乎既矢石聲迫近
善出與苗言學校不可毀於是遇害明年逢避地海上
謁先聖廟見善誌救火於廡壁得臨死事實於進士潘

元慶洎見予友孫作而又聞嘗謂作白城池多艱君有
親可亟去吾以死扞廟學廟學不存士日不競因感泣
而別於乎善之死蓋不待決於倉卒患難之間或者乃
弗是之過矣夫朱泚之亂何蕃一叱叛者遂爲傳宗今
苗闕廟學士於其時禮所謂朝不坐燕不與潔身引去
固無可罪若胡先生不徒然其死其志蓋可哀也逢以
其生既不偶死復泯泯乃爲賦詩且論列于左

和吉州何節婦詩韻有序

何婦賀永新人至正十三年斬兵殺其夫將汚之賀曰
竊聞帥令嚴淫虐者斬以徇若獨不懼徇乎兵退言諸
帥議聘焉賀曰彼禁淫虐自欲委禽未亡人耶未幾聘
至賀閉戶不納齧指血題詩曰涇渭難分清與濁妾身
不幸厄紅巾孤兒尚忍更它姓烈女何曾嫁二人白刃

自揮心似鐵黃泉欲到骨如銀荒村日落猿啼處過客聞之亦
慘神遂刎死東海徐蹇趙郡趙鎮先賦古風予和韻云
風塵旦暮未亡身庖吠何堪動幌巾斗血倒流三尺劍九
泉下見一心人竹祠長夏飛蒼雪月闕中天爛白銀聞道
琵琶亭在望賣降舊鬼獨傷神

題張會嘉桶底圖 有後序

道者深藏玉斧才罷修明月下蓬萊笑隨流水天台去袖
裹登州海市來霧幌雲窻開翠壁異鄉靈響接瑤臺神遊
萬里愁回首故國蒼涼獨雁哀

右是圖出吾鄉葛氏葛氏世居青陽鄉宋名臣邨之後
內附初家貧惟母在夫婦資賣酒以養凡爲具務罄利
之入極母所嗜好或雨雪晦暮庭戶掃迹屢傾貲如其
奉一夕有老道士酤百錢已宿焉明日夫婦蚤作候道

士不見問諸保者曰道士酣寢時見一彈丸丹光奕奕
射木榻外既聞爪甲聲若蟲食桑藿然餘不知也夫婦
驚惋熟視卧內惟有所刻畫桶底耳當是時好事者購
墨本惟恐後而母氏卒賴以壽終君之謂葛夫婦孝感
所致云

送陳檢校從藩臣分鎮淮安

闔閭城外陣雲興草木依微殺氣凝雪霽長淮齊飲馬煙
消清野疾飛鷹羽林密號傳符刻幙府初筵列豆登有道
折衝千里外牙旗小隊看春燈

題天竺妙侍者所藏訖笑隱張伯雨倡和什後

湯休麗藻世無多修靜清名孰有過赤水玄珠歸象罔寶
花丈室散維摩日邊並倚凌雲作林下新傳擊壤歌句曲
長干舊遊遠鵲飛無奈月明何

山行二首 有序

庚子十月二日董竹林居士邀予出吳城西游十餘里
捨舟循花鹿白鶴等山度鳳凰峴觀紫牛洞遂登宋張
監遐觀亭故基斷岡殘隴四顧蔓草五世孫天祐讀書
力穡其下忻然接予曰自兵興來學士大夫少有至此
者因題詩壁間

水送山迎風滿衣
蒨花梔子散林扉
紫牛一去洞雲合
白鶴重來人世非
亭倚高寒瓴甌在
仙遊長夜珮環輝
諸孫爲具蒸藜餉
自笑登臨不當歸

是午由牛圈塢南行數里得覺林院少憩既西折登

百餘步林楚就暝遂止興教寺僧源肅吾二人具酒
饌沾醉乃寢五夜驚聞雨點聲甚繁載聽之蓋鐘振木
葉墜露耳徐起盥擲源脩湯供延坐小軒軒面蒼峭壁

泉玉色瀦壁下僅尋墨許指笑曰是足供千百衆然未
有名予名曰咸泉取澤在山也移時過竹院飯偕眺尤
美亭巘崿斗絕捫蘿薦而上仰蓮華峰殊神秀亂石虎
搏人立杉楠榆楓相參錯爲丹厓翠壑天風泠泠迴見
鳥背使人作凌虛想源云亭右垂有石扉側開陜隘纒
容身中則寬廣時雲氣上齊若葆蓋羽車然意必靈異
所宮欲下燭幽隱辭姑名曰靈雲之洞又言峯絕頂俯
太湖洞庭光爽滿面宜吾二人者老此或與飛仙接二
人者董竹林居士其一也居士吳產累遷儒官晚慕晉
七賢用是號潛其名云源愛儒文章因居士首倡四韻
懇人求和并紀泉洞得名自予始詩曰

袖中詩卷杖頭錢
十里雲山一宿緣
曙鐘響振珠林露
天供香分石壁泉
葆蓋羽車靈岫出
丹厓翠壑小亭連
擬吸

具區三萬頃頡頏飛上大青蓮

題程達觀外史洞雲深處

洞雲深處神仙宅空翠不收常晝冥金鵲尾橫香按靜青
蛇影卧土花腥天壇瑞草敷雷雨石竇寒泉注月星更闌
一瓊高爽地遲予來守內黃庭

同鄭遂昌山人張谷賢俞樵夫艤舟石湖登拜郊臺

留題上方寺

高秋木落紫嵐開載酒登臨第一回亡國不無西子恨拜
郊猶有僭王臺上方樓閣中天倚直北風雲幾日來三老
班荆話間樂石湖魚鳥莫驚猜

故封安陸府同知飛騎尉華亭縣男謝公德嘉挽詞

執友懷材德人皆長者呼官封安陸府宅抱澱山湖華胄
遙通晉榮光近接吳書詩陳典雅環珥侍瑤瑜襟量黃生

林澤集二

廿七

匹交情鮑叔俱墓山依客鬼有義山葬寓公死者金帑貸家奴盜嘗
問不鱸釣蕪波潤池驚草露濡兵戈十年內不忘禮王符

龍江治圃

原憲安貧以樊遲學圃初揔名江泌菜不是鮑焦蔬甲坼
烽燒外心承雨澤餘酒香兼果菰羹美帶蝦魚華髮冰壺
傳茅齋種樹書鶉衣分晚摘肉食鄙春耬嗜欲情除妄道
遙道集虛妻孥防歲饑甕盎備冬儲

洛陽靳惟正信州揔管利安公之子太平揔管處宜

公之從子太平先殉節死丞相達公以惟正廕太平
同知今將有事中朝枉顧海上時予病聊短述以贈

梧竹鸕鸞羽蘭茗翡翠衿舲船淞泖入圭竇草萊深藥鋟

夫容火冠投玳瑁簪山人非索價公子素存心天府周南
國霓旌漢上林高秋使命返金玉俟徽音

送僧蘭古春亂後還省先塋

儒行蘭開士先塋在富春摸金無校尉掛劍有行人薤露傷歌早松風入夢頻杯浮羅刹渡酒酹客星鄰天地啼鶻血庭闈戰馬塵式瞻追遠義孝治若爲臻

哭呂貞惠處士

南國長林楚西崑片玉英周旋鄉里難終始歲寒盟甲第風塵合璜溪月露清義聲驩勇弁私試集文衡屢散千金積還辭七品榮性中天爵重身外野袍輕柳送浮春鷓花邀轉曙鶯深期陪几杖俄報舉銘旌世亂嗟新俊秋高哭老成名公題翠石來裔照華纓

節婦謝淑秀詩有序

謝淑秀宋太學上舍國光孫隱居教授進脩女淑性閭敏年廿贅里中許榭室家雍穆逾十年榭蚤世有女孟

若溪集二

廿八

柔子龍困皆幼或者諷使再適圖終養計淑曰吾不幸蚤寡猶幸生詩禮家不見奪於共姜之父母又幸不見迫於媯覽呂超之權勢矧有母恃養無足憂者吾惟志是守子是鞠承乃宗祀而已尚何言諷者赧而退淑清苦自持及終母制孟柔歸某氏龍困知樹立亟命學醫因誨曰夫醫治亂不廢之業且樹德莫醫若汝其無怠後果亂龍困以醫母獨優裕今六十餘歲矣人又以許賢母稱云

貞居婦謝氏名重陸雲鄉頭雪機猶織眉青瑟罷張野霜遺秉淨池雨漚麻香團鏡收來匣長檠弃在墻壺闈恬布素家廟肅珩璜祖澤詩書遠兒醫德業昌柏舟多後勸柳絮有餘芳水落新魚罟春回舊燕堂中庭孀月白四境戰塵黃倍感陶嬰操因之補一章

趙長者詩有序

趙長者名禮字信父泰州之丁溪人生而寬厚未冠父聞同里孟翁女有容德爲聘之時女年十四矣初翁有子女輒殤夭晚得是女鍾愛之及笄以目疾瞽翁病焉辭婚於其父父以語長者長者曰不可始孟氏許我時目固明非誑我也今不幸致此而悖常渝盟遠近知其爲瞽女誰乎娶翁夫婦老且死女無適從人必責我大義不若堅前好焉父喜謂其母曰吾兒直有華陰呂氏之風後其昌乎既娶相敬如賓生子女十一人玉其中子也中年家益饒迎翁夫婦就養翁歿葬猶父鄉大夫士咸稱趙長者趙長者云長者事親孝與兄裕弟璧無間言以壽終于家王之外祖母嘗以子撫育之長而知讀書奉外祖母如其父卒服衰三年歲時不絕其祀

梧溪集二

廿九

今爲水軍都萬戶

淑女春蘭秀仙郎玉樹姿目從何日瞽義守百年期團月開紈扇雙星結綵襦韜輝唐鏡匣流響蜀琴絲遂叶熊占夢旋生燕頤兒德齊中饋禮恩出外家慈蒿薤俄霜露蘋蘩繫數歲時留題長者傳庶望厚民彝

宮中行樂詞六首

羽獵罷長楊宸遊入未央鸞開雙畫扇鶴舞百霓裳玉盞瓊花露金盤紫蔗霜長門誰閉月流影在倉琅

望幸影娥池微吟紈扇詞露盤迎月早宮漏出花遲珮雜鑾和響雲連雉尾移君王肯時顧從愛趙昭儀

明月窺彤管雙星直罽駟宴分王母樂詔授薛濤戔穀雨親蠶近花朝拾翠連魚龍曼衍戲次進玉階前

積翠澂波潤披香暖殿開天低烽火樹日動蔓金苔獺髓

勻猶濕羊車過不回
賸陳烈女史萬一漢皇來
芍藥爲離草鴛鴦是匹禽
君無神女夢妾有楚王心
日短黃金屋宵長綠綺琴
相將戒霜露拜月繡簾陰
金鑰魚司夜瑤箏雁列春
後庭通綺閣清路接芳塵
同脩三千數誰辭第一人
君王壽萬歲行樂此時均

聽葉琴師觀光操有序

觀光操者三衢毛敏仲所作也至元間仲偕武林葉蘭坡徐秋山遊京師三人者咸能琴受知宰執薦名世祖皇帝仲以爲士之道莫尚于賓王先王之化尤莫尚有虞氏之教故緣徵度聲作是操以應制比召客死館舍予聞其音激越悽惋不純乎徵傳曰徵亂則哀仲其自哀也夫雖然仲之心至矣是時海內外群生萬物方旁達交暢仲首擬南薰之歌用啓聖聰比隆有虞中道而止豈先王之樂未當復歟於乎先王之樂不見復於世皇制作之日畢竟何時興耶使後有吳季子必曰樂有在也蘭坡孫惟一彈是操且語是言因序其事而系以詩

夜聽觀光操心神四座開
馬駝千里道龍虎五雲臺
長養南薰入紆餘白雪來
世皇虛席待竟起伯牙哀

觀楊一枝外史鳴球琴元贊附

溫潤而實玉其質也清越不淫磬其音也朝陽之桐弦
徽被之彼美天球維其似之

驪龍珠四八共爾久浮沉
造化深藏器神明密賞音
水蒼寒軫玉星緯暗徽金
拂拭煩君手朝陽作鳳吟

得尚書汪公凶問

凶問落江邊儒林氣愴然
亂中天未定身後日同懸
孝甚

曾三釜廉殊寵一錢樗材荷推獎思報輯遺編

錢公義舟中同賦

薄暮扁舟發春陰生野寒赤堊看水柳清響送風湍詩好
頻分札篷低屢整冠松鱸九峯酒爛熳罄餘歡

倡婦徐

至正壬辰冬

殺之龍

江章

孟文詩附

燕憤罵弗

妾非花月舊時妖曾事忠良樂聖朝今日黃巾刀下死陽
城下蔡莫魂消

東帶朝衣供奉孫虜庭歎死報皇恩妾今一唱貞元曲孰
濺西風碧血痕

平康巷裏掌中身翠舞珠歌玉樹春不得籍除今義死
天容倡婦媿降臣

和戎婦陳聞鴈有感四首有引

浪喜燈花落又生夜寒頻放剪刀聲游鴻不寄征夫信

梧溪集二

四

顧影娉婷無限情右婦陳聞雁而作題于華亭戍壁逢
友張洙宗魯和一首青蘋風起別鴻生寒盡春來不寄
聲多少離群歸欲盡天涯拋棄獨何情謝嘉維則擬答
陳二首軍裏何曾髀肉生隴頭日夜血流聲內人莫怨
孤征雁縱寄安書莫寄情缺月微明瘴霧生兩鄉夢斷
玉簫聲無由並跨秦臺鳳夜夜離鴻別鶴情宗魯曰陳
錢塘儒家女夫本縣曹吏因兵亂隸軍籍久在外或勸
曰若質美性慧往富室爲女紅不猶愈守空戍忍寒飢
乎陳答曰寒飢小事耳不已察而汝聽失節莫大焉或
者慙而退未幾夫挈歸里人至今稱之

羈雌見月可憐生月落江昏過雁聲不特題詩想夫壻漢
家多少玉關情

介胄多年蟣蝨生寒窓今夜落邊聲螭頭釵子鴛鴦股獨

自挑燈萬里情

兩地何知死與生
鴈來愁聽月邊聲
多應萬里孤飛影
只抵長門一片情

江南江北荻花生
妾處君邊第一聲
何似春風湖上宅
銀箏玉柱白頭情

海晏軒前雙鴛鴦歌爲曹涇分鎮朱芹湖作

盛明天子狩有期
駕鴛鴦若有神靈司
剛風高寒翅盡直
鷹師縱鷹雲眼碧
斯須毛血灑行輦
太官親庖奉玉膳
當時畿甸禁畧嚴
此日江淮矧弋滿
朱然將軍興義風
雌雄養之庭苑中文王
沼上古月白房相池
頭春草豐飲泉啄穀
觀者美願爾雙飛上
筵几亂離無復鳳來
儀雄多被殺留其雌
將軍必也放歸北
天子馱兵今節食

題楊元誠太史宮詞後

梧溪集二

四十二

玉珮瓊琚雅頌詞
流傳中禁萬方知
獨憐夜草除奸詔
親奉綸音改到時

公嘗與范滂同草黜
逐伯顏太師之詔
草文云詔書到日上
曰自早至暮皆一日
也可改作到時結句
故云

題謝太傅小像

一起扶維半壁天
未應絲竹醉嬋娟
始八公北下風雲冷
想見山河月影全

吳江書所見

虬髯使者銀貂裘
胡床醉酒芙蓉舟
文章太守不敢近
一聲水調勤回頭

撥頭船兒葉不如
漁郎衝風暮打魚
傍人心怖自歌笑
老龍正在江潭居

題郡守翟仲直太白問月圖

玉醪如露瀉頗黎鯨吸秋空萬象低柰爾浮雲翳明月清
光不照夜郎西

景陽井

踏臂歌殘璧月昏騎龍猶藉井生存石闌漫浣臙脂色不
似湘筠淚洒痕

簡任伯溫檢校

旌旗交影鳳池邊退食微聞午漏傳猶比至元無事日印
文銅綠長苔錢

官厨日送蒲萄酒畫省春看芍藥闌不忘舊爲丞相掾手
圖天馬獻金鑾

丙申正月十八夜吳門雨黑雨廿二日午見日中黑
子劉都漕貢摠管留不果既出舟次口號

始憂黑雨夜傾城又駭無雲日晦明百口親鄰船倚著仲
宣去住獨含情

仲雍墓側晚峯青頭白鳥啼滿驛亭太守心旌懸大樹故
人書劍逐浮萍

靜安招提八詠爲寧無爲上人作

碑存赤烏年僧指青燈夜風雨寒蕭蕭黃旗儼來下

水怪移象罔野火飛熠燿丈夫殉節榮足免行殯誚

故國空蚯蚓老檜餘瓔珞根地終系陳不與庭花落

神僧聊示現肉眼爲驚睥水淨天空雲何緣同一莞

縹帙白象籤金書貝多葉稍披四句偈已斷七支業

甘香蟻丘漿清涼楊枝露一勺徧大千天龍不敢吐

秋風兩岸著野水千家遶隻履自東歸零亂霜天曉

龍歸驟覺寒雞遠不知午長年四簷陰颼颼竹疑雨

梧溪集卷第二



